

摘藻堂四庫全書薈要

集部

欽定四庫全書薈要

集部

秋澗集卷三十二



臣董誥詳校
詳校官助教臣謝登雋


欽定四庫全書薈要卷一萬六千一百八十八集部

秋澗集卷三十二

元 王惲 撰

七言絕句

詠早梅四首招曲山同探

 早梅春信臘前開
竹外橫斜映野臺
待看一林相慰藉
約君同往肯前來

松風亭下一樽開
終日徘徊醉竹臺
霜帶冷香歸去晚
夜深猶傍枕邊來

花開花謝催人老
花木無心人自哀
折得一枝香在手
且分春色入城來

梅花風韻不凡才
冰雪方凝始見開
任使和羹無翠實
等閒斤斧不為災

夢酒張鍊師

道人尸解栢陰臺
三尺瑤鐫卧綠苔
昨夜月窓清底夢
分明霑醉謝文來

題劉總管宅御愛峰

太湖清潤岱宗雄
金宇宣和第一峰
絕似水晶宮裏看
一堆寒碧玉玲瓏

詠梅

銅切塗黃點酪酥
細薰婆律發溫鑪
老夫鼻觀多知見
不用燈前問玉奴

一脉陽和擅獨根
滿枝金蕾鎖春溫
惜花人老情緣在
剪斷春風倩女魂

尚愛梅君似細君
題詩重過去年門
經年不見春風面

為恐啼痕似蠟痕

梅花開在百花前
苦節貞心只自憐
縱使孤根有餘暖
玉顏於世為誰妍

為愛梅花徹骨清
冷香能幾謾含情
春風果有和羹用
未害肝腸似廣平

江路吟看發興長
西湖浮動月昏黃
冷香本是幽人供
枉自踈籬比玉堂

日日雙瓶換水溫
為憐幽谷似佳人
夜來紙帳青燈夢

繞遍羅浮樹下春

蠟削肌膚玉作顏
淡粧終不入時看
苦吟正有西湖老
凍繞枯枝賞歲寒

芳叢百繞問花開
夢在仙人萼綠臺
為報主人多置酒
臘前冬後約重來

我識西湖處士心
一生梅竹是知音
誰知二百餘年後
又見諸孫鶴在陰

偶題記參政飛卿語

睡起東齋日上牕醉扶頭罷炷爐香似勝東華相里
關
夢繞鐘聲入省堂

曲山見示古雪詩云盡道豐年瑞豐年瑞若何
長安有貧者宜瑞不宜多西山反其意又和
瑞尤多一絕云人言盡道豐年瑞其奈無衣
貧者何曷若方春發生際不愆時雨瑞尤多
予細思之古詩雖如此似不若少陵無食思
樂土無衣思南州哀而不怨也因繼韻為解

嘲云

暑雨祁寒俱致怨無私造化待如何呈祥剛道豐年雪
却恐吾儕怨更多

題竹林七賢詩

并序

竹林七賢觀今為長春別館昔誠明張真人嘗集諸
公題詠欲刊置祠下迨至元辛卯鍊師劉文甫始導
命以紹宿志求詩於予且誌其刻名本末用題於石
凡得詩若干首始於王文康公終之鄙作非敢先後

之蓋因其所書之次第焉使後之觀者詠詞懷舊得
信高風絕塵之想云秋澗序

漠漠筠林指舊栖幾年於此避危機奇才最惜嵇中散
空聽鸞音月下歸

談玄高出萬物表七子風流有典刑三十年間凡五過
塵容慚愧草堂靈

竹林高卧世稱賢隱放看來未中權千古歸潛書法在
一迴來讀一條然

作者當年亦七人粗聞名姓孰能親山王首作彈冠舉
却恐筠林是要津

嵇中散

識短材長蓄禍機放懷獨惜養生嵇後人莫坐談玄罪
秋水篇中物物齊

粉飾青黃乃木災當年中散固奇才高風不逐鸞音去
柳下奚為打鍛來

阮步兵

口腹無嫌乞步兵虱藏裨絮又堪憎浪為廣武山頭嘆
尺鷃何能況大鵬

王司徒

兩簾收來蔽以身不應顏面愧佳賓燈前手執牙籌弄
枉對河山說隱淪

山吏部

從來吏選苦紛紜過眼羣材得所甄若論雅懷關得喪
山公於晉是能臣

劉參軍

荷鍾隨埋見性真等閒談笑解時嗔竹林七子多沉酗
醉裡乾坤獨可人

向散騎

心醉玄談外此形自知中有未忘情異時未達堯心對
枉泥南華與理爭

阮始平

禮法踈來萬事沉琴心鐘律是知音聖門論樂中和止

不似吾威到樂淫

題范文正公真像

岳記梁碑冠古今當時文筆見忠忱
細思後樂先憂說士子今誰抱此心

題長沙醉草圖

萬有龍蛇落筆端滿堂風雨夜深寒
書家最是通神處疊指懸鋒不作難

堂堂萬里長沙陣曾與張顏角長雄
信道書家同一法

提鋒應解入神功

又題謝東山

江東全倚謝家安
雅量形容對奕閒
勝負胷中前定了
風聲何賴八公山

題家藏顧虎頭畫謝安曳杖圖

一枰初散竹間碁
杖屐歸來喜可知
欲見虎頭無畫意
捷音讀罷到門時

獅猫

何年變體自條支錦爛修毛見兩形夢裏鼠山京觀了
午欄花影淡離離

和苦齋見寄巖韻

不才自分賦閒居薄有山田與敝廬鄭重漢庭楊得意
薦賢心也到相如

兩首詩來以動言徵車早晚出山門苦齋刊落紛華盡
獨有忠君一念存

病裏行藏未易言夢中待詔望君門回頭碌碌因人去

自笑張儀舌謾存

題日者壁

三尺神鈴手內提
看來萬命幾曾齊
百錢餬却談天口
一片風簾日未西

乾坤一氣本中和
其奈人情六鑿何
帝道已還皆未劫
不須苦泥貴人多

當年卜隱不明誰
四相行藏見側微
從此閉門終寂寞
老天似厭太知機

星槎遠泛斗牛杓萬里歸來齒髮凋碌碌又教攀附去
不知何有補清朝

鍛鍊五行分造化斟量四柱別公卿百錢贏得生涯了
一片風簾任晦明

喜彥祥生還故里

千里西還已五年枝巢雖在不勝寒半生歷試何清慎
依舊春風首肯槃

寄苦齋老友

今年一病到龍鍾遲速前驅有不同健羨苦齋攀附意
秋風雙翮欲摩空

題何鍊師又玄堂

大道難名說又玄取為堂扁示蹄筌函關紫氣經臺月
又見先生一再傳

題眼科杜金山卷

白日青天墮晦冥百年未滿若為生金鑱一刮神光爛
此藝爭傳杜氏精

心火燔空水下濡外腴中涸已堪吁雙眸眊眊青燈底
忍更看書似老奴自戒

過王化店

王化崗頭四望開西山吹盡凍雲埋東風借暖憐衰老
滿馬晴暉曝背鮐

羣鼠盜茄圖

食飽官倉到落蘇嗜甘不計首深濡丹青似見公儀意
紅女園蔬戒併圖

題閑閑種德堂記後

轉折掉躡軒豁頓挫態度不同乃猶人面要能自成一家為貴予於公書亦然

闕

香色臭味

而荔實為美推類至極須以江瑤為比者豈易牙雋永而當然之理固如是乎

斯文斯翰兩翩翩與試稱名孰可肩一贊呂溫真傑作更開生面到凌烟

倦書圖

書貴凝思在筆前欲揮還止想翩翩畫師若作行雲了
妙與天機兩索然

題洛神賦畫後

淒斷西陵松柏聲將身自試謾為情陳王正是無聊賴
流眄川妃欲目成

屈原卜居圖

用舍行藏聖有餘却從詹尹卜攸居乾坤許大無容處
正在先生見道疎

山林長往眇難攀
死不忘君世所難
邂逅去從詹尹卜
八方歷過果何安

遂初亭

韋杜城南尺五天
眼中朝市有林泉
不須苦泥興公說
絲竹何妨解倒懸

厭喧思寂尋常事
以隱為高拙宦人
出處似君應不爾
西池東閣見經綸

山林長往懷高致
富貴逼人將奈何
閒向遂初亭上坐

一樽高詠採芝歌

宋太祖蹴踘圖

凡六人對蹴者趙普傍看者太宗八王一道士與從者一人劉向別錄蹴踘黃帝所作或曰起戰國時蹴踘兵勢也所以練武士知有才也

榻邊咫尺夢金陵欲下河東勢未能畫史意傳當日事丹青圖上見軍興

婉戀龍姿五客隨內庭深處共遊嬉筆端欲見無窮意

一點香塵欲起時

太平朝野日歡娛肯效三郎和碧梧治定不應忘武備
花間蹋鞠是雄圖

倦書圖

六朝人愛倦書圖唐閔令喜而臨之妙在約畧濃淡
之間

玉堂昨夜醉厭厭格筆傭書見未快似待指端餘力散
卧看花影轉疎簾

筆陣堂堂到倦書
紫蕉歌暖錦氍毹
細看三子從容處
當日安知不有吾

二美人圖

錢選
筆

春醉瓊枝意未諧
行雲空鎖望仙臺
九重不隔簫聲斷
喚得長空赤鳳來

右趙
飛燕

璧月瓊枝醉舞裊
泠泠蘭舌半詞臣
國亡只咎傾城色
滿眼胭脂井底春

右張
麗華

固陵雪鵠圖

取鑒前王有覆車三韓風色儘愁予
長江飲馬年年事
筆底寒禽辨得無

韓文公重幘圖

熙載南朝亦宰臣後來狂放欲全身
比教乞食歌姬院
坐閱棋枰似可人

名教之中樂有餘只須棊槩可歡娛
晦翁微貶文昌意
正為先生不著書

張麗華

手擎白鸚鵡
鵲自調

雲間三閣綺成霞閣上仙人萼綠華
蘭舌不應詞客巧自調鸚羽按庭花

西施

西施為物一何尤吳已荒亡越可憂
一枕勾王春殿夢抱冰寒苦變溫柔

孤舟橫笛

王晉卿筆

秋風葉下洞庭波橫吹歸時逸興多
筆底分明詩外意武昌南岸老人歌

淵明漉酒圖

趙子昂筆

牀頭釀香奚待壓脫巾漉酒良愜人興來酣適無不可
過論總非公所真

雪舟夜話

劉文甫藏

大定明昌五十年當時文物蔚中天雪蓬夜話無多味
党蔡風流墮眼前

跋張真人雙頭蓮手卷

嫣然池面出雙葉花本無心道自如若與主人論遠近

闕
香當闕愛蓮書

有虞鼓琴

趙霖
筆

逌匹誰如帝子崇和鳴還與五絃同異時愠解吾民阜
本自君王正始功

送張鵬飛同知兩浙漕事

張侯又見走跋跋雲海相望四十春記取都城相別處
細炊香飯煮金鱗

送司毅夫之任共城

皂蓋東歸五馬榮
太行南下是共城
春林布穀應饒古
剌著青衫竹馬迎

司君才調號能官
駿足終陪十二閑
天意似教優此任
政成坐嘯看青山

中州佳麗百山門
太守風流兩漢循
細酌百泉亭上酒
政煩留意鑄斯民

題姬義士卷後

掩瘞無歸責已任
凱風吹棘遂初心
絕交端為西華發

較似劉標義更深

題紀伯新詹判如溪詩意

通人無滯與溪友坎止流行到兩忘
羨殺胸中瀟灑意
一橫烟景夢滄浪

源源不絕產蛟鼉若論潛冷一勺多
莫惜玉甌沙上酒
醉來閒聽濯纓歌

題麻姑壇記後

麻姑來會蔡經家麟脯珍盤間異花
海上仙人多狡獪

半盂白粲走丹砂

黃初平牧羊圖

金華春草碧淒迷
牧到亡羊事可疑
風袖一揮岩石起
道人還有此神奇

題泰和名臣碑後

金源肇跡海東隅
奄有綿區亦壯圖
最是泰和嘉靖日

朝廷綱紀盡文儒

為當時自宰相至
掾吏全用進士云

癸巳歲二月六日自得仁甫西歸和李樂齋詩

行宮朝散馬駢駢喜動都城白板扉鄭重小桃深有意
留花不發待予歸

題姜詩躍鯉圖

舍邊泉出躍雙魚感自龐姬孝有餘畫史載容非小補
丹青渾是蔚宗書

清泉故里兩無蹤坡老詩成竹樹風展放畫圖增永嘅
丹青於世不無功

後二句取唐張彥遠畫記序畫者掛也以彩色掛物

象也故鼎鐘刻則識魑魅而知神姦旂章明則昭軌
度而備國制以忠以孝盡在於雲臺有烈有勲皆登
於麟閣紀傳所以叙其事不能載其容賦頌有以詠
其美不能備其象圖畫之制所以兼之也陸士衡云
丹青之興比雅頌之述作宣物莫大於言存形莫善
於畫此之謂也

清明日南城訪友

客裏清明散滯懷也隨游子出城來東風似惜春光爛

柳眼雖青細細開

題嚴子陵還山圖

藉其意而反之癸
己夏聽除間作

富春不起最為賢
星彩空輝帝座寒
縱便放還江上去
已應慚見釣魚壇

跋徽宗退朝圖

唐虞道統不知傳
師事林靈信妄言
三十六宮春寂寞
玉清雲上夢朝元

傳說烟空有九霄
朝元仙路碧迢迢
轉頭風雪韓州地

方悟簪裳是服妖

水車圖

人定真能力勝天一車翻水溉高田漢陰機在終無力
長憶郊居值早年

題昔刺公奉使江左圖

閼
照江東馬首雙旌反見公三十年來和議定

閼
當代不無功

和戰當年楚已空一丘衰草葬南鄘卷中題詠真名筆

褒羨人言是景鐘

孫登長嘯圖

先生可想不可見
秋月千山白鹿臺
吹作半空鸞鳳響
公和真是不凡材

闕

意

不妨玄髮散麒麟

不幸遭逢晉魏間
先生出處兩為難
才長識寡嵇中散
只待明言覺膽寒

秋江待渡圖

兩崖鐵峽束蒼江
風浪無時一葦航
險阻脩嘗無太穩
臨流將渡復回徨

秋江極望圖

乾坤清氣滿詩脾
望入霜空思未迷
誰着畫工橫截斷
一行秋影雁飛低

韓生寫真圖後

韓郎落筆凌烟面
嘉老摛文造物權
名下自來無妄譽

伯時多為九歌傳

乙未夏重午日偶得一扇絕與吾鄉龍頭谷形
勝相似因書一絕於上

太行西北是龍門便面圖看爽客魂千尺綠蘿飛瀑濺
浩歌還憶醉靈樽

定羗李氏昆季三人係李遊仙之裔同歸三教
走筆為賦

德積繇來慶自賒三英同秀定羗家從今沮汝汾西曲

三教堂中看棣華

大定明昌五十年一時文物說游仙
料應書案山前月
更覺秋空皓彩圓

史院即事

聖德神功浩有餘
竹書何翅十三車
近觀養士

闕

開局而來已六旬
倉皇曾不計殘身
一朝汗簡
有
敢說兼修為乏人

宋徽宗石榴圖

安石赤榴自漢來十年西域武皇開寫生若論丹青妙
金馬門前待詔才

顯宗墨竹

筆藝初非羨顯宗承華主鬯兩從容天教二十年陰賜
護養風雷見籜龍

午窓番畫顯皇書問寢龍樓孝有餘夢到承華欄檻底
露梢烟葉盡扶疎

題冀州趙節孝侍祖母韓詩卷

眼前諸子芝蘭秀堂上慈親九十儀若取陳情論樂養
趙生心事勝捷為

五福君家有自開閨門全是孝慈來異時旌表瞻榮觀
高似陳思燕處臺

野春亭

為劉仲文賦

出仕清朝接俊游閉門閒處更風流君看綠野堂中客
未必心安勝素侯

春滿青林花滿烟風光深鎖市廛間都城何限豪家樂
輸與劉郎未老閒

鶴門無意上揚州果熟能勝萬戶侯近日治家尤有法
課兒書誦五更頭

韋杜城南尺五天千金不惜買林泉左山信手拈春出
一片浮光鎖翠烟

憶昔過門得故人示予亭記思清新白頭青竹題詩客
一笑揮毫到野春

沙頭乾盡玉瓶雙香冷
牙籌刮錦囊長日閒庭有忙事
青衫時課讀書郎

四皓圖

尺一招來四老翁
真真高興振孤風
少微不是閒人像
調護前星最有功

人慾橫流不易攻
留侯真是帝師雄
笑將二老歸周意
翻作商顏羽翼翁

夜壑藏舟未厭深
皎然松雪映高林
閒雲終作從龍雨

唯
有
留
侯
識
此
心

蕭然亭

澄淵橫壑東坡語
窓竹驚秋太白辭
解使六塵能此淨
不煩華構與新詩

坡仙信筆張園記
寫盡豪家隱仕情
出處兩間無不可
最憐婪入使商名

遂州張氏出家資
修建學舍僧鎮公
來索詩因

題其後

三關控接阨邊塵四十年來草棘春不為兩庠燈火事
孜孜求義到斯人

太白獨酌圖

九重春色醉仙桃何似江山照賜袍千丈氣豪天不管
青山磯上月輪高

李太初元齋

時為濮陽主簿

一氣中含萬善根夫何為善即吾仁不煩力剖藩籬破
已覺軒中浩浩春

魏提學授膠水令

菁莪樂育為求賢十載京華柄學權
今日一官滄海去
春風千室聽鳴絃

贈相士梅心

長嗟躍冶不祥金忽漫求名竟陸沉
萬事不如方寸好
愛渠開口便論心

贈相士秋巖

乾坤清氣滿秋岩顧我行藏試一談
早晚得歸林下去

北山重掃讀書龕

跋單檢校吉甫所藏江孝卿手書真草二帖徵
君諱紱曹南人

我初不識檢校面見此可嘉平昔心光景片時爭屬目
獨憐遺翰是知音

有客臨風惜壯圖不從奇耦計榮枯因卿憶起江君事
閒氣銷來一點無

讀韓文外集

韓子為書有正傳精詳無出穆修編不應集外生浮誕
三簡誣公夢大顛

瑞鶴詩

方平家近鬱蕭臺視履推祥有自開拈出扈山交感說
胎仙非止異香來

龍虎堂

甲午秋九月二十八日
迎謁自懷來四過其下

玉華行殿拂明開北狩南巡此往迴長憶先皇重遺老

玉堂今歲幾人來

一作長憶先皇思治
切天顏喜動老臣來

百靈拱護走風雷萬馬雲屯駐漢臺今日鼎成弓劍遠
西風吹淚不勝哀

觀光

嚴森弓劍拱重圍蕩蕩高空日月輝先帝老臣今有幾
瞻依恒勅近天威

三秋迎駕走居庸一道青山返照紅新店到都才九十
坐車乘馬兩籠東

抱關休訝去翩翩霜滿征衣月滿鞍只為冕旒初未拜

至今眠食未能安

紅雲現處拜瑤亭
皂蓋歸時午夜行
半醉喜乘歡勸酒
居庸關下聽雞聲

噶布拉川在上都西北七百里外
董侯承旨扈從北迴
遇於榆林酒間因及今秋大獮之盛
賦六絕以紀其事

絡野籠山捲朔陲
畫隨湯祝懾天威
客卿莫詫長楊賦
聽說今秋第一圍

詩詠騶虞發五縱漢家圍合萬車同料應老上龍庭北
谷靜川空說俊功

千里陰山騎四周休誇西伯渭濱游今年較獵饒常歲
一色天狼四十頭

萬里宣威見令行君王耀德豈觀兵我詩擬配岐陽鼓
要與周宣作頌聲

今年大獮殫林秋青兕黃羊以萬籌搖吻戍兒欣有語
好雲從此到南樓

今秋天餉住冬糧萬穴空來殺氣蒼渴飲馬洞饑食肉
西風低草看牛羊

隆福行宮

詩裏山河瞻象服女中堯舜宋宣仁從今隆福宮闌月
聖壽輝煌一萬春

四海坤儀自正家垂簾休獨美瑤華側聞聖善如先后
在昔天皇有懿誇

賤名猥被平章奏供奉詞林舊老臣細酌金壘宣勸出

一年三荷寵光新

題沙門宣公手卷後

海藏龍宮鬱紫烟
逢辰僧到赤烏年
白毫千丈渠能制
何俟韓書重大顛

秋澗集卷三十二

欽定四庫全書薈要卷一萬六千一百八十九

集部

秋澗集卷三十三

元 王惲 撰

七言絕句

野莊圖

并序

承旨董公繪野莊圖為求諸賢題詠中齋草序以同人致亨晦叔撰銘以儼倫溢美恐未盡公臆之所在若夫士君子出處固皆有命不可以遲速工拙為言然當得行道時靜退之心何嘗食頃而不在懷也以

艱於自云必託物以表其志雖未能掛冠神武斂裳
霄逝較之鐘鳴漏盡不已行者猶賢乎已喜為賦詩
初不計其不自量也其辭曰

午橋吟醉平淮後商嶺鴻冥定漢餘正恐野莊歸未遂
九重思治望新書

老筆鍊餘詩律細事機諳久宦情踈輞川圖上王摩詰
靜退為心是本初

寶珠換却杖頭鳩空見秋瓜憶故丘白首相看官舍底

晚年心事轉優游

輓馬圖

馬蹄立論見天機
四輓塵沙更適宜
恰似解袍隨意處
小齋礧礧退朝時

題錢舜舉畫梨花

香翻玉笛真妃怨
雨暗霓裳樂語淒
不似錢郎能駐馬
滿庭風日醉如泥

水西千樹開春華
莫把芳容帶雨誇
看取一枝橫絕處

洗粧還是漢宮娃

題廐馬圖

前年扈從獵長楊
偶雜髯騶宿野莊
一捧玉華三百疋
老人垂淚說先皇

三笑圖

元聖開天一理融
推心不外善為宗
後人剛作無同論
三子相逢笑殺儂

題劉道引卷末

傳家素有延齡錄手澤珍藏鏡李辭吹就棘心親不在
每觀淒斷凱風詩

題朝元宮劉道人秋聲圖

紫極宮深景氣秋脩脩牕竹發詩愁謫仙千古風流句
輸與歐公作巧偷

少年心事讀書臺涼入郊墟已快哉星漢在空人未寢
一聲猶憶樹頭來

甯戚叩角圖

長夜漫漫志未伸
單衣雖弊霸圖新
一匡已在夷吾佐
激烈商歌惜自陳

覺山寺題示

貞元改號夏四月九日為勅建司徒鞏公墓碑同朝
貴來會需命間客有談盧師當遊者闕山闕道阻遂
折而入覺山精舍觀泉闕景氣瀟爽不復留宿為

恨山僧泚筆請留詩于壁偶書此以記來曾偕遊者
太一李宗師承旨董野莊太學李內翰東平賈彥載

秋澗老人王惲題

為樹瑤鑄未奠間杖藜尋勝一躋攀
世間萬事真難必
來訪盧師入覺山

誰削蒼巔峻作崖碧瀾直上妙高臺
靜功儘辨瞿曇鉢
石罇清泉送玉來

山因寺勝寺依泉雲自無心景自閒
懶陟上方窮達目
黃塵深處是人間

丙吉問牛圖

休驚宣父才難歎兩漢調元見是公後世幾人能辦此
抹時纔得一姚崇

右軍觀鵝圖

照眼雙鵝引頸來
胷中妙思與之偕
寥寥尚友千年後
只有涪翁識此懷

又跋問牛圖

坐理論思一相功
只今機務簿書叢
後人刺口無輕議
世事看來總不同

閩海道憲司書吏張禧事母以孝聞本道具辭
上達得請乃以所居論秀坊為純孝坊時禧
母近百歲健如五六十人諸人賦詩為慶

吏業傳家說寧馨炎方享壽見徐庭婉容還憶相看處
燭治官書在憲廳

養親致樂固多歧無重承顏志不違純孝表門纔兩字
四山和氣動春暉

平生快吏元康筆俯就功名力不難邂逅南陔見深愛

為親初不厭卑官

鄉閭顯異有新書衣錦還家喜不如歸到建園春正好
里人拭目拜潘輿

寸心擬報春暉養祿食榮同賴叔羹兩地月明思最切
倚門心事正懸旌

建人悍勁尚氣節不爾秀狎多文儒鄉閭今說張忠孝
還似中林返哺烏

淵明臨流賦詩圖

秋水門前有令姿先生非是好吟詩因觀逝者如斯說
天運何嘗有息時

題存樂堂詩卷

當年膝下侍慈顏滿樹悲風入夢寒不及一杯菽水養
對君慚愴淚闌干

寸心不到南陔養空羨中林反哺鳥最是范公含恨處
百年溫飽見妻孥

題成經歷晚翠堂

雙檜堂前晚翠新
歲寒相對更情親
東家桃李君休羨
爛熳光風幾日春

七十平頭恰數朝
望秋蒲柳到松喬
何當醉

闕

處

滿院秋煙濕翠翹

明皇驪山出獵圖

都尉王
晉卿筆

五家錦繡迷川谷
萬馬旌旗獵帝師
治亂兩途明在眼
丹青渾是黍離詩

玉泉巖

并序

元貞二年正月中旬兩夢登海山絕島明日隣人葛
巨川以此山見示巖壑四面皆自天成色深翠秀麗
惜其淪落泥塗慘淡有未之發者上刻五題曰壽山
曰玉泉巖其傍絕頂有懸流一咏下注山足甚鮮明
也曰崆峒洞曰子陵灘曰白石瀨皆以金填形勢與
玉泉山不殊疑前金宮中物也

兩夜登臨倚碧岑夢中驚絕此崎嶇朝來翠射娉婷底
笑煞平生未足心

送韓推官之任廣陵

歷試諸難貴遠期休言為吏莫為推煩渠細讀隴岡表
恐是廬陵積慶基

花樹韋郎好弟兄當時同宦最關情三年不見諸韓面
却為儀山即送行

元貞丙申立春日作

前歲徵車起陸沉清優特置在詞林明知不是商顧客
當體先皇養老心

終日思歸憶故山
玉堂金馬有堪憐
只知蓮炬君恩重
其奈山公啓事偏

六藝蹴空成底物
龍鍾何有玉為堂
眼明愛殺韓忠獻
到了蘇坡一議郎

題西湖圖

東南形勢說餘杭
誰辦山谿作國防
踏雪欲尋龍井去
表忠祠下謁錢王

丙申歲京師元日門帖子

三冬露處無家客七十殘年有限身強項一生今潦倒
更將低首嚮何人

中舍無心喜外遷非緣詞筆厭雕鐫眼中故舊飄零盡
唾點從渠最可憐

錢舜舉折枝圖

探花走馬醉西城歲與東君似有情不是今春風色惡
折枝圖上看清明

院中即事

元貞元年為脩實錄
移在北中書省內

有時下直出銀臺三昧楞伽亦快哉不似近年官事急

小車還聽御批來

李肇翰林志說前輩傳楞伽經一本函在屋壁每下直出門相譴謂之小

三昧出銀臺門乘馬謂之大三昧如釋氏云纏縛而自在也

重遊玉泉

并序

元貞二年龍集丙申三月二十八日大駕北狩同翰林諸君送次大口回獨與孫等西過玉泉因憶至元七年御史裏行時來遊者一十有五人歲月如流轉首二十五年今在者李司卿輔之溫漕使次霄與不

肖三人耳人欲久不死而於人世何如也凡得詩三
絕留山間而去

輾轉澤車轉碧崖山煙喜客望中開畸人問我從何自
適送臺輿大口來

進水山僧去未迴日長空閣獨徘徊尋詩不到瑤華境
踏遍松間碧色苔

山頭亂石闌欂桷水底浮光浸碧霞絕似蘇門山下路
惜無脩竹與梅花

清白圖

為何掾
舜舉賦

傳家素有游儵潔竊祿生憎碩鼠貪三考臬司如一日
眼中何掾得無慚

題韋偃十馬圖

浮深角壯恣游嬉沙苑春風碧草齊聞說紫宸初立仗
內家正要不鳴嘶

國初鞍馬說江都今見韋侯十駿圖獨愛少陵忠義氣
艱危安得濟時需

賀東泉翁山中雜詠一十三首

過眼紛華興未闌人生難得老來安
山中致爽饒清賞

不是悲秋強自寬

山居

為愛淵明不自賢夕陽飛鳥兩忘言
已邀白石羲皇上

況復青山是故園

清美堂

啟期三樂素非狂帶索行歌老自量
明理已安循理轍

息心元是養心方

歸來亭

生平游刃擬青萍一日歸來與道寧
繞樹每憐驚木鳥

思親時上望雲亭

望雲亭

丹砂玉屑燕窠瓷臺閣風流見一時桃李春光能幾日

惜君元有歲寒姿

幽芳軒

朝三暮四本來齊誰為兒童較栗梨今歲見花欣實美

山中風物要通知

香雪原

田家剥棗暮秋初野甑蒸香木蜜酥不富正緣無滯貨

芋魁牆外又成區

木蜜圖

山中處士玉堂仙兩地相望思渺然說有詩來多勝槩

含情多在碧雲牋

杏塢

靜約幽人品羽茶偶來稚子去鋤瓜問君何似東陵日

猶是崦山故老家

瓜堰

門外清泉兩汊流臣心如水平何求濯纓濯足終多事

已分心身到逸休

東泉

樹影扶疎聽鳥音可堪時事百年心高情愛殺陶元亮

一醺秋香見獨斟

西泉

德澤涵濡得二難百年祠館見遺安蒼蒼一片墳臺石

留在行人下馬看

墳館

士論推稱謚最公
瑤鐫三尺刻文通
因君喚起西南興

夢寐洄溪碧斂中

先君衛士夫私謚為文通先生

曹右丞生祠手卷

前年拜掃玉墳廬
笑逐雙肩到並驅
林薄氣清侵邃宇
人家春社樂于胥

農樂無如歲有年
更將民瘼細為蠲
應憐右轄祠邊月
花柳深村有二天

李白醉歸圖

雲陣橫陳大渡河一書能解六蠻和
仙韶莫詫君王寵
七寶粧嚴未是多

襲美堂詩

雲中張釭母姓楊氏性資淑惠小心敬畏早見知於
宮中出入禁掖垂三十年前後賞賚濃渥楊歿上思
保育之功贈安翼趙國夫人生子六人長曰鎮出刺
荆門沂水二郡其四曰鑑知東勝州餘皆宿衛宸庭

襲美看來嫩在中當時安翼有深功春風吹下蓬萊閣
二子歸來五馬驄

自題寫真

白髮刁騷一幅巾遺書浩浩百年身縱令不入麒麟畫
已是三朝館閣臣

李德裕見客

唐韓晃筆徽宗
臨并御題在後

金鑾載筆寵光多三鎮風聞自削磨開運中興元兩樣
相君勲業邁蕭何

恩雖平日太分明
胷次看來氣未宏
不鎖宅坊傳衛士
諒知堂上有奇兵

闕

動華夷機務論思儘有為
一貶未應生重

闕

崖州山色要新詩

經綸心事在思亭
據榻高談似自矜
不見省中溫室樹
孔光終了說何曾

有才善處是無權
朋比為心自黨偏
邂逅郡樓回首處
杜門應羨晉公賢

意氣揚揚與脅肩較來失德兩同然春風滿眼桐花鳳
不是當年謬謬賢

送同知范君璋之任平灤

昆明授法起號嗣民瘼洗蠲宜飽知後日鳴絃千室邑
豈惟活國說良醫

三紀承恩鶴禁深一官灤海任浮沉固應天上張公子
好識當年大范心

張遂初詩

鶴禁辛勤四十秋端功端品可封侯一官纔入尋常選
猶被時胥問解由

需軒

閉閣陽城醉似泥諫臣為論在韓疑一朝力折延齡相
識得三陽出險時

據按事從中道處洗心思與繇辭新小軒不似朝來喜
倒屣門前不速賓

則天朝回圖

萬有潛隨一氣回
武炎如火李如灰
上陽宮殿春風暖
花底朝鞭隱若雷

過瓮山記

老人語

刑清兵寢歲豐穰
五十年來帝道光
駝馬欄東逢老叟
向人猶解說先皇

題劉元禮挽詩卷後

有得歸為怙恃榮
三年索米可憐生
一杯不及慈闈養
空有殘魂繞斗城

三尺旅墳燕地鬼一篇新序翰林詞友生最是情鍾處
夢斷空梁月落時

客死無歸最痛心李生哀痛惜知音只緣識得天倫重
不為黃金綠綺琴

任氏具慶堂詩卷

積善中來慶自全一堂和氣覺春寬人間兩字風流處
貼在兒曹額上看

壽援諺語應餘七數比名泉更益三婺女老人元瑞世

兩星今見濟之南

劉簽事友竹亭詩

退食歸來對竹吟
相看同抱歲寒心
只今眼底交情薄
不似環亭翠影深

公子清標有足多
紫微垣外侍雕戈
料應瞻彼猗猗興
瑟澗功夫見琢磨

題錢選臨曹將軍臨臙驄圖

涪翁醉草丹青引
秘省珍藏獵騎圖
老眼再觀知有數

喜從唐本玩臨摹

龍種生來見異姿
春風舞影下瑤池
馬中岳湛錢郎筆
寫盡坡仙七字詩

刻烙天全固可悲
不應顧影自驚嘶
君看慘淡經營意
重為莊生解馬蹄

首脫金羈藉帝閑
春風沙苑草芊綿
承恩幸在休閒地
誰與爭鳴八駿先

良驥初非以力聞
丹青傳寫畫圖新
超超說是千金駿

蹠嚙何曾到園人

相馬圖

駕駘安分老青芻駉駉論才白璧酬相馬只今誰伯樂
解教駉驥兩垂頭

題趙崑人馬圖

崑五代人嘗為
朱溫駉馬都尉

天廐真龍自不凡未妨束縛具羈閑當時一筆千金重
今恨無人說趙崑

甲午歲門帖子

旅食京華兩見春
衰年來作玉堂臣
一家溫飽恩光裏
補報無妨愧此身

題徐中子方愛蘭軒詩卷

吏部尚書實
喇衮索賦

幽蘭在谷似幽人
相近相親有使君
獨愛遜綿詩律細
宛從平淡發奇芬

手治蘭臺種竹圍
護香籠日淡炎暉
絲綸閣下文書靜
却似當年對紫薇

山行還喜得夷途
路轉蘭皋更可娛
十里晚煙香不斷

春風吹袂過鵝湖

予嘗往來錄信間景物多異惟鵝湖山氣清淑土脉馨潤所產花卉非蘭

即翠竹其餘有不敢與之並者晦菴先生少時愛其地勝嘗讀書於此特表而出之

濟南錄事參軍解君瑞芝圖

曄曄亭亭紫蓋光氣和無地不分芳一枝特秀溪堂下
似表參軍政異常

從來腐朽化神奇正自餘精發菌芝浩蕩上林春色裏
自憐蒲柳望秋衰

題李巨川衆芳亭

引水溉餘紅藥秀遶欄看得綠陰春帝城擾擾黃塵底
獨惜幽香亦可人

傾囊不惜買花栽釀酒留香待賞來說是西園蕭索客
從今無復眼慵開

主人襟韻有餘馨俯仰乾坤一草亭餐菊佩蘭當此際
江漁休笑屈原醒

淵明歸來圖

獨遊初不為良晨步入斜川別有春多是斂裳宵遁日

眉間歸色喜津津

徽宗花鳥圖

無逸圖空冷御屏醉香珎羽惜娉婷不思三代池臺樂
感致中和本四靈

疎梅寒雀圖

吾愛梅花結素緣野莊胷次本瀟然枝頭凍雀何為者
時許分香到夢邊

長記扁舟過武夷仙家梅竹滿清溪山禽盡日憐幽致

爭棟寒枝趣晚栖

題邢君用意齋

萬城方伎響邢君
顧我龍鍾老病身
賦就瘁梨空自惜
幾時相對意齋人

百疾中來有變常
智人察色信能量
細看難素縱橫說
到了何曾有定方

醫言意也精微而危
不誠無物誠斯明
斯意誠心正
以至國治治國尚可
奚難于醫仲尼無意
人孰能追

莊生任意我非敢知惟神聖功巧意行不疑然後是
齋之所謂意者庶幾得軒岐之遺

甲午歲門帖子

新春元日兩爭妍氣朔分齊本自然不待書占雲物喜
上旬壬子是豐年

題張太師浩家集後

功名有分事無難談笑貂蟬素履間松菊堂深歸未老
西州扶病歎丘山

跋雪峯居士顛草後

筆從簡古發濃纖書到顏樵兩具瞻不意雪峯揮翰手
怒轟雷火學秦蟾

濡墨池邊說醉顛書家初不數鍾權縱橫詰曲千文帖
篆隸中間有正傳

元貞二年秋偶至新店觀光驛迴思往事蓋三
十五年矣因書壁以記重來

漢署風雲控北坡萬方奔走聽虞羅偶思三十年前事

夜半郵亭索傳過

湘江晚渡

賈傅懷騷動楚悲
退之伸禱謫潮時
黃陵廟下山如畫
暮鼓聲聲聽竹枝

寒溪四友

霜下溪南氣已凝
物華從此見衰榮
漫山桃李春能幾
愛煞寒溪四友清

枯木寒鴉

枯樹寒梢凍欲冰
野鴉翻影若為情
錦鳩呼雨烟林外
紅杏香中過一生

楚水歸舟

漢東歸興楚江帆
老我南宮百不堪
莫訝西宮烟棹速
秋霜香滿洞庭柑

菊軒

姜君美係斗南先生外甥

姜家籬落似斜川
野圃秋容淡淡烟
何待白衣人送酒

一軒風物已陶然

生平愛菊菊名軒細撚秋香憶昔賢似續外家無盡藏
壁間渾寫和陶篇

子路問津圖

轍環天下老子行二子相忘不輟耕休為聖賢分二致
本來出處不同情

元貞三年門帖子

平生報國宦情疎千里思歸意未舒只有暮年心健在
一燈清影課殘書

大簡之山水橫披

雨濕溪烟凍不飛
一舩燈火曉光遲
風蓬冷泛東山月
記我茶洋早發時

知本齋

先生憲府舊乘驄
骨鯁人稱鐵面翁
此日籌堂見餘慶
一門和氣樂融融

人物原原有自來
特將知本榜新齋
歸根返壑皆吾事
庭草春來綠滿堦

灞陵風雪圖

詩瘦清於萬顆山蹇驢駝入畫圖間姓名得掛金鑾月
風雪長途是等閒

跋左山公書東坡醉墨堂詩

閉戶經年翰墨場鐵心人道漢王常折衝不縮堂堂手
思入顏楊鴻雁行

夢回仙以丹劑療疾

黃鶴留題世已驚又遺丹劑化盧生夢回仙馭無從見

何處秋風一劍橫

碧桃青鳥圖

上林春滿漢宮烟
翠雀飛來態度閒
王母西歸方朔去
碧桃花影語關關

瀛洲仙集海微茫
翠鳥湘桃更異常
似為碧霄宮寂寂
故傳芳信到劉郎

孟母三遷圖卷贈新軒子張

孟母三遷養聖功
芬芬千古振高風
披圖欲識頤齋意

人道神交管鮑同

題張昭信濟江調兵記目

堂堂大將伯顏公萬舸浮江節制雄今日河山歸一統
却從遺藁見元功

題蕭氏承顏亭

魯門為孝固多聞不似承顏孝節純人說小亭如斗大
一闌花木四時春

東坡赤壁圖

先生胷次有天遊萬里長江一葉舟欲托悲風瀉遺響
恐驚幽壑舞潛蚪

題錢舜舉牡丹折枝圖

翠帷高捲出傾城並髻凝粧別有情似為洛人驚絕艷
兩枝相倚鬪輕盈

李擇善甫貫錢詩卷

營營市井逐錐刀戈戟相尋較一毫焚券貫錢如棄屣
丘陵宜並泰山高

宮廊校書

新簡朝章報恐差青編槎碎旋添加就中書削無多意
坐到宮廊柱影斜

任伯如慶母夫人八十之壽

發光簾幙寶煙濃八十慈顏壽樂融
健羨鹿泉新句好一堂和氣畫圖中

風高雲夢夕

江連雲夢多夕風萬斛龍驤簸蕩中
長記瓜州乘醉渡

片帆幾落海門東

枯木寒鴉

亂鴉翻影上枯枝
點綴荒寒見野祠
絕似首陽山下路
滿陂晴雪祭餘時

秋蟬堂詩

霹靂湘琴得正傳
新聲曾擅泰和年
五音又與人俱逝
時賴秋蟬續斷絃

屈原對漁父

國既無人我不我知秋風澤畔一湘纍君臣大義明如鏡
抵用漁翁辯啜醢

題張君利甫秀巖琴譜手卷

故家人物秀岩仙一曲瑤琴有正傳鄭重張君寶遺譜
不殊親授廣陵篇

題紡績圖

三晉遺黎樂士農綌絺為業略相同紬思七月豳風詠
不到春坊錦綉工

千里秋晴圖


出門藜杖思飄飄
千里晴霄見羽毛
特為樊川發清興
南山秋色兩相高

秋澗集卷三十三

謹按卷三十二第二十五頁後四行噶布拉舊作甘不刺
今改

卷三十三第十七頁後三行註內實喇亥舊作昔刺溫今
改





總校官進士臣胡榮

校對官學正臣卜惟吉

膳錄監生臣謝蓮鐸